

桂苑筆耕集

蘇子瞻
知覺

桂苑筆耕集卷之九

別紙二十二首

都統王令公三首

浙西周司空五首

宣象裘尚書三首

壁州鄭尚書二首

鄭太保相公一首

都護軍三首

衛常侍一首

泗州于尚書二首

都統王令公三首

近者專馳賀狀伏計已覽卑誠久絕來音但多景戀
令公始終陶冶表裏經綸王商能止於訛言謝萬暫
提其勁卒棄窮寇姦兇之魄活疲甍震懾之魂行既
順天捷當克日某比承詔旨久緩師期今伏見令公

命許君親身先將校幸叶彈冠之望倍驚投袂之心
已闕全師既離樊鎮雖自稱岸上之虎或謂當仁而
不畏水中之龍實歸重德唯期助役非敢貪功欲取
來月上旬決謀進退直衝宋野先會梁園謹遣專人
咨探行李輒覲迴信聊紓遠懷伏惟恩私深賜鑒察
云云

第二

累專寓狀粗得翰誠繼奉榮緘益銘殊眷不審近日
尊體何似夏星没火秋瑄飄灰仔妖氣之雪銷想軍
聲之雷振伏計振振君子之德侔侔勇夫之誠足可

憑有慶之威誓無譁之衆功期一舉勢必萬全謝太
傅之智謀預知大捷鮑參軍之歌詠唯佇中興伏惟
慎保節宣用諧時望某常銜曩顧况捧溫言朝禱暮
祈可量卑懇云云

第三

某自承令公親率銳師作殲窮寇便謀訓練欲赴戰
征願折豺牙仰瞻馬首履山川而犯霜露久決心期
擐甲曹而峙糗糧早成力辦不料徐戎忽聚費誓猶
陳未器征途難通饋輦以此早申誠懇但切憂惶伏
想萬夫爭殲弩之先八表望建寮之令佇見龍歸魏

闕却迎鳳舞荀池雖居冢息跋行盡解口祈心禱某
早窺偉量遙稟壯圖仰視旄頭漸覓奔箴之慶俯看
展齒唯懷斷折之虞恭旗捷音專申賀禮未前祝望
不暇啓陳云云

浙西周寶司空五首

昨奉緘翰兼寄示書碑樣眷私既深披閱無倦其於
榮朴無以喻陳某每念久握兵戎累移節制雖績弓
裘之業未揚鐘鼎之勳况乃來暮歌稀行春化拙豈
期膚獎特采微勞許標不朽之規遠降非常之寵至
如仲尼儒術始流芳於沂水之湄元凱戰功方掛美

於峴山之頂愚實何効遂叨此榮司空念切憂忘事
諧響應猥垂恩力妙選書工所謂知臣者莫若聖君
成我者固須良友有始有卒念茲在茲彼雖未起雕
鶴此已先深銘鏤今者干戈務擁筆硯事踈不及別
請他人敬遵來命唯望早成刊勒實賴獎憐其碑詞
同封呈上云云

第二

錄溫者已歲異謀玷污玄化螻蟻暫成聚窟鴟梟貴
欲同巢誠謂天高可欺不知日遠能照果彰罪跡遂
舉刑書既絕慮於竊鈇俾成規於用鉞言堪自賀事

必相傳豈料司空染五色毫飛一函紙徵美詞於魯
史辱虛譽於劉牋列土除兇不負國章在手臨風拜
賜其如戎律拘身未啓素誠但銘殊貺

第三

揚示詔書仰窺聖旨佇攀高躅倍激壯懷司空寄綰
吳門敢懸魏闕况奉臣戎之命必興王者之師但希
水簇舟舡幸遵舊俗山堆戈甲早振雄威副大君旰
食之勤慰下走朝飢之望某祗看風信便泛江程五
兩翩翻解指朝天之路三軍踴躍待申破竹之功許
接後塵遠示行日儻可從心所欲必希攜手同行王

道有言無作楚囚相對劉琨養勇以誅逆虜為期事
可榮今切何讓古既銜帝語勿老師徒願因江漢之
征得遠瀟湘之遇云云

第四

伏以山岳降靈尹吉甫之全德風雷奮氣竇世寧之
異祥况乃景值新秋時當聖代間生英傑高達勲庸
伏惟相公名可掩瑜志堪棄璧魏公子春霆振響有
物皆驚晉大夫冬日流輝無人不愛深蘊安劉之業
終成佐漢之謀今則又慶生辰永寶景福出握元戎
之柄既播嘉聲人持宰相之權則迎惡詔禱祝攀戀

不任下情有少續壽之儀謹具別狀寄獻云云

第五

專使押衙傳遜至啓閱華絨奉承珍貺光輝奪目荷
戴銘心况承已奉堯言永除回恐繼好息民之義遠
耀麟經輸忠報主之誠頻傳鴈訊喜氣連鋪於兩岸
嘉聲遍振於四鄰敬仰成規深敦曩契唯願內防蠲
譖外息狐疑必期勩力於公家不敢欺心於閤室伏
惟深賜云云

宣歙裴度餘尚書

今月十六日裴校書至伏蒙深追曩顧迥黜違言損

之以榮牋辱之以好幣情敷刻畫無非譽過之詞事
繫琢磨寔是愛忘之眷既多受賜永切銜知不審自
履閏秋尊體何似伏想蟬噪暮景鶴叫晴空樓下長
溪閱政聲而不息窓中遠岫引詩思以無窮伏惟侍
膳之餘公退之暇精加保愛佇俟龍徵某早願攀嵇
近蒙善鄭深祝瞻望豈任下情云云

第二

去年因景氏子有小人言讒誣之事多興噂喅之詞
不少動成忌器久阻親仁昨以戎首既摧禍胎自剖
遂脩舊好聊達微誠伏蒙尚書特請嘉賓遠賚厚幣

俾息四方之笑永通兩地之歡捧嘉貺而增榮窺雅
言而竊抃况對蓮池之客實逢桂苑之仙自此句渚
清波已能流惡隋河遠派亦得洗瑕鍊多而既識金
精燒罷而共知玉冷伏惟仁鑒俯察愚衷云云

第三

當司宣歙院被浙西越局侵權差官套務以強自恃
謂暴無傷仰計通仁備詳深弊今者醜務却仍舊貫
已有詔書浙西雖近宋龍固殊魯瘠只解租庸副職
尚提招討兵符宜慙已往之非用結將來之好竊知
猶尋亂轍愈弄雄權再署周正罔思唐令宣歙院上

違聖旨下阻群情實虧臣子之誠豈道鬼神之怒既
失用和爲貴唯知長惡不悛伏望尚書洞察事情俾
全理體雖知秦鏡固無遺鑒之虞或恐齊竽猶有濫
吹之者能摧狡妄遠托威嚴亦慮官吏驚疑必望深
加撫恤幸甚

壁州鄭凝績尚書二首

賢尊相公不聞庸虛早垂眷顧每念攀鴻之懇頗傳
整薦之書動皆陶侃之手蹤曾非陳遵之口占寶玩
而字終不滅何翅三年輝榮而恩有所從倍賢十部
况與尚書頃依鳳里已覩龍章清談深仰於阿戎異

禮得攀於侯，豈高山仰止，何日忘之。今者遠辱榮緘，
過垂虛譽，永言抃荷，但務鐫銘云云。

第二

某素無材術，謬荷寵章，頃握兵權，方舉上將軍之令，
爰沾膺渥叨，承大司馬之榮，仰覩鳳書，深慙豹略，此
時未審尚書躡八花墀之影，綴五色筆之詞，刻畫恩
深，游揚意重，不獲早申感激，遠謝褒稱，又奉華緘，方
知麗藻，雖早榮紙，貴固無愧於士安，而每想筆乾，實
有慙於玄照，既多闕禮，何贖深辜，伏惟眷私，終賜恕
察云云。

太保相公鄭畋

自丞相公大卽再持廟筭大庇藩條况蒙特假陶鈞
正歸推莞雖則魯爲長府仍舊貫之言行其如晉閱
被廬作新軍之意切未能措手尋見移權凡所阻難
自能審度遠垂批示倍荷恩私如愚者焉所獲多矣
敢速官謗有負親知伏惟鑒察謹狀

護軍郝公甫將軍

某用舍行藏唯遵帝命始終去就莫洽群情仰酬萬
乘之知豈計一朝之恣昨者繼窺天旨更勵冰心遂
令專介傳書願得近鄰釋憾周相公似能遵稟免致

悔尤既知遽瑗之非必息廢頽之怒一帶水永除多
梗九重天實鑒忠誠自此日聆鷄犬之音風識馬牛
之性往來無壅彼此相成斯皆將軍遠贖睿慈旁均
和氣共成美事但荷深仁特辱芳緘過垂虛譽銘戴
慙惕豈任下情

第二

特垂寵示過辱獎詞竊知將校官寮三軍百姓共陳
衆狀請發奏章以爲煙塵自起於四郊塗炭遍加於
九野唯有斗牛之境稍無戎馬之灾此實地分所招
天心見庇蓋承黎之福也何功力之有焉豈料將軍

過聽衆詞助成美事欲煩錄奏特賜傳言然以拙政而誘群情以虛言而干聖鑒固爲不可實所難當伏惟終寢奏論俾速官謗便同受賜非敢矯言伏惟允察云云

第三

特辱華緘猥傳吉語初驚善謔終荷深仁某每省庸虛過沾寵寄未能報主豈至封王雖漢代諸侯亦流恩於異姓而周書列爵須示賞於殊勲曾無剖竹之聲詎有分茅之望既非實譽必恐虛傳但慙眷私未敢陳謝云云

前左省衛增常侍

忽奉榮緘特垂善誼宣父則欽遵三益老君則唯贈
一言仰銜成我之恩但抱起予之歎自常侍遠勞仙
騎俯顧弊藩竊承久陟道途倦垂軒蓋戀德而被雲
尚阻懷誠而啓露未期每憶笑談莫勝飢渴某也早
以勤行至道唯希翊贊聖朝張良正遇於漢恩敢言
絕跡范蠡未除其越耻諱欲逃名非求八百歲以成
春但讀五千言而勵節幸無大故且恕小瑕方願惠
然肯來豈將率尔而對云云

泗州于濤尚書

蠢彼徐戎聚茲餘燼敢侵貴境再逞姦謀只應夾就
誅夷固可立期撲滅况尚書德超定國威跨栗磳妙
略防危實知孺子可教強隣結憾是表忠臣不和去
年既振雄威今日更資茂績此已微軀衆旅救援仁
封永言牙爪之勤須託指蹤之妙願諧群望暫屈長
才輒敢請充都指揮使仰俟一呼之命同成九拒之
功冀耀兵權早燔寇黨得脫齊桓之耻唯憑郤縠之
賢伏惟眷私深賜照察

第二

昨者竊聆有拔城之議遂申忠告冀保遠圖伏奉廻

緘得窺深旨且徐戎肆虐固非楚子之能泗俗懷忠
不比蕭人之怯欲謀自潰何謂克終雖云有慮於防
川豈可潛思於坐井某近奉詔旨頗促軍期即得經
過貴州便可剷除寇壘未見殷輪之苦且更勉旃其
於浚釜之言已承命也他具前狀此不繁陳云云

桂苑筆耕集卷之九

桂花筆耕集卷之十

別紙二十首

魏博韓侍中一首

鄂州崔大夫一首

考功蔣郎中一首

前泗州鄭常侍一首

新羅使朴貞外一首

蕭相公二首

田軍容一首

都統王令公一首

浙西周相公一首

前宣歙裴尚書一首

幽州李太保五首

徐泗時司空一首

田軍容一首

振武赫連尚書一首

幽州李大王一首

魏博韓簡侍中

一自黃巾北侵翠輦西幸蝗無避境蟻已壞堤內無
宮闕之灾外結藩維之耻諸葛爽者豕食難飽豺聲
易騎却躡迷途敢凌貴園侍中手馭虎隊心閱豹韜
一陣纔施三城遂復雄功始建冊命俄臨永為壯士
之盛談別作諸侯之美事某昨欲剖巢燻穴久為淬
甲勵兵及出師徒又蒙詔旨且令利權山海鎮壓江
淮一弭國讐先資邦賦然其奈夜眠軍幕霜橫枕上
之戈曉掛戎衣雷吼匣中之劍終願親揚勇略靜滅
克徒伏惟鑒察

鄂州崔紹大夫

遠蒙仁私持示表藁其於歎仰無以喻陳某夙練戎韜願裨王略不愧於管天錐地猶勤於撮壤導清速敢累貢忠誠冀迴聖鑒儻或六龍下峽豈同五馬渡江中朝之禮樂無虧下武之功猷斯在果蒙大夫惠於宗族贊以表章過垂華袞之褒益睹彩毫之妙古詩云不惜歌者苦但傷知音稀今日知音幸遇之矣然榮示中媿茂弘之德業齊越石之機謀自顧瑣才何當虛譽今則王道清望已推於首座相公劉琨至誠亦付於襄陽僕射必期英鑒永察愚衷云云

考功蔣泳郎中

特勞專介忽辱榮絨過垂軒冕之履永真巾箱之寶
實慙彼已豈敢當仁卽中學士暫避難時偶勞僑跡
今者官清司績職峻集仙麟趾殿中久侍駟鸞之客
螭頭階上則親吐鳳之才豈唯舉四善之精詳蓋必
脩九重之顧問鋪陳組繡演暢絲綸則也虞夏商周
之書重行聖代蕭曹魏邴之位更屬何人詎可守三
徑之寂寥慮千山之險阻許垂訪別專冀祇迎伏惟
眷私幸賜鑒察

前泗州鄭廉常侍

竊以寇戎未殄士卒多驕凡曰郡侯實難政理縱得

上和下睦猶爲朝是夕非况福乃儻來禍惟不測但
無慙於屋漏亦何累於國恩然而常侍蓋切奉公匪
踈撫士雖云驚擾終免侵傷有以見爲政無私當仁
有裕伏承已離泗水始及淮山捧閱來緘爲謙往答
其於瞻仰胡可弭忘然則郡守懸魚既繼古人之節
塞翁喪馬可寬達士之懷云云

新羅探候使朴仁範負外

忽奉公狀脩睹忠誠慰愜欽依但增衷抱負外芳含
雞樹秀稟龍山來登天上之金牌桂分高影去陔日
邊之粉署蘭吐餘香今者仰戀聖朝遠銜王命捧琛

執轡棧險航深能獻款於表章欲致誠於官守雖無
奉使難在此時九州之侯伯傾心萬國之臣僚沮色
幸來獎鎮得接清規况奉貴國大王特致書信相問
將成美事不惜直言儻負外止到淮壖却歸海澨縱
得上陳有理其如外議難防無念東還決為西笑聖
主方深倚望賢王佇荷寵榮道路亦通舟船無壅勿
移素志勉赴遠行峽中寇戎或聚或散此亦專令防
援必應免致驚憂且過壽烝可謀征邁館中有闕幸
垂示之而來探候事已令錄表申奏敬惟鑒察

蕭邁相公二首

某累貢表章請議巡幸忠誠屢罄宸睠未迴與保始
終再陳利害匪望河陽之狩願迎汾水之遊竊以諸
道賦輿皆遵峽路多是僭五致一蓋已萬水千山後
網不繼前綱所貢不如所費况近者西從蜀國南至
荆門似有微灾恐遺巨患忽若草寇侵據江陵阻艱
則榛梗既多苞茅莫入或更蠻戎伺隙必令越雋勞
兵避柱觸楹防微可誠行舟墜劍執滯固難甚以孝
子不諛其親忠臣不諂其主遂陳狂瞽遠黷聖聰唯
望略泛龍舟暫遷鳳里庶使九州修貢不愆任土之
宜四海歸仁盡遂朝天之望且賊巢兇狂聚衆穢黷

經時縱能早覆煖巢豈可便迴法駕淮南乃寰中俗
富閭外名高喻以金甌永無罅缺比於玉壘實異繁
華伏惟相公居注意之朝處決心之位周成王之卜
洛始託姬公晉元帝之渡江終資仲父早申決議仰
贊宸衷能成可久之規益表無私之德某頃在西川
制置及於南詔通和雖爲先察於微豈欲驟稱其伐
但緣相公皆垂目驗不敢面欺則今日荆蜀灾星未
能退舍吳楚福地實可遷都事歸從權化資垂拱永
致一家之理必輸萬里之誠某言不近誣志唯遠慮
非棄日官之業冀垂天子之恩幸望國僑無譏裨竈

謹以具表陳請訖伏惟

第二

伏以物忌太盛器滿必傾自古有言至今爲誡苟或
不能知止但欲貪榮則有折鼎足之虞炊劍頭之險
某每念遭逢聖運紹續舊勳北定羗戎南征蠻蠻東
降齊盜西建蜀城高提三尺之權粗展四方之志然
自煙塵聚孽原野宿兵曾無敷閱之全材先叨統師
詎有縱橫之令策無領利權而乃不能首唱義聲身
先銳旅戮奔鯨於海澤逐柘犬於秦關遽及火熾祠
篝火驚御輦遠聆巡幸便議征行但以每當誓衆之

時即奉止軍之詔雖自始終勵節其如進退失圖華
元興城者之謳子產致國人之謗乃有浙侯構隙沛
將加兵三年已來二憾不釋蝸蟾競噪蚌鷓相譏厚
誣而巧弄舌端顯奏而亂搖心曲求刺舡而不暇想
投杼以難逃伏賴相公照以秦臺調之伊鼎察邾公
之愬鄭伯解晉帝之疑石苞免桂刑章尚縻寵秩既
蒙明洗誠合淬磨更修克己之心永竭勤王之力直
以松筠不改雖自保於堅貞蒲柳先秋遽已傷於衰
暮筋骸漸憊志氣潛摧縱欲自強終憂不逮今者幸
遇上京已復大駕則迴麟閣龍吟固息興妖之慮放

牛歸馬實迎偃武之期某也既在清時誠爲棄物况
縈沉痼深負壯圖攬鏡無慄投替是念豈慕祈奚請
老尚處冗負唯思范蠡愛閑得行素意乞解所職自
卜爲宜伏惟相公選士惟賢退人以禮俯矜羸某特
賜允從雖慚未遂報恩免更久爲尸祿仰干陶冶敬
託牋毫始知調慙聲哀唯愧詞窮理盡伏惟俯賜恩
鑒

田軍容

某慙無術略久竊榮寵提漢法之重權陟秦官之極
品莫申展効何贖貪叨况自寇盜奔侵京都陷覆久

守咽喉之寄不成毫髮之功雖兵柄既多固難措手而君恩未報實切醜顏况乃室怒潛興鄰讐競起陸遜徒稱其佳吏崔暹終憾於癡人顯奏相誣多言可畏幸蒙軍容推心庇護極力保持雖遭貝錦之詞免陷織羅之罪祇合以戀軒思幄策蹇磨鉛畢命爲期在公無倦但緣攝生罕妙從役久勤齒髮既衰精神亦耗少私寡欲敢言君子者乎多病愛閑方謂古人是也智力不可強進寵章不可濫行睿覺妨賢只宜求退今者肅清鳳闕撲滅梟巢彘弓矢以銷兵永除戎備垂衣裳而致理廣任賢才如某者寒灰罷燃昏

井誰顧徃歲之南征北伐雖忝當仁此時之尸祿素
食逾慙非據既失行驅十衆豈能卧護六軍輒貢表
章懇辭爵位伏惟軍容察以有犯無隱之義難進易
退之規仰贊帝俞俯從愚願敢有脅肩諂笑固無沒
齒怨言幸逢四海之昇平願指一丘而養老干黷清
德兢惕實深伏惟云云

都統王令公賀冬

伏以律管潛吹星躔改候觀臺望瑞雲物呈祥伏惟
令公每布祥雲常懸慶日三軍黃弩挾楚續以忘寒
五夜執戈擁孫衾而達曙必資景福早建殊功雅當

肅殺之時便遂討除之勢四方聳耳佇聆大捷之音
萬乘傾心永致中興之運其末由陳賀但切禱祈

浙西周寶司空

伏以禮慶履長傳標視朔夷夏契混同之運乾坤叶
交泰之期伏惟司空相公浙水流恩吳山變俗既睹
趙良之日永洽物情願親傳說之星早環帝座末由
拜賀但切禱祈云云

前宣歙裴虔餘尚書

伏以禮稱迎日傳載書雲當寰中賀聖之晨是水外
寢兵之際宜陳善祝仰薦殊祥伏惟尚書政報塞帷

慶賀溫席已捧徵黃之詔固諧夢說之期人仰板輿
羨老萊之榮養帝留金鼎待伊尹之來調某雖戎律
拘身而清規在想未由拜賀但切禱祠

幽州李可舉太保

碾玉排方腰帶壹條并金魚袋壹枚金花銀
合盛重一百六十兩

右件腰帶體質廉潤功就琢磨雖慙鄂坂之金稍勝
延陵之縞珪璋比德宜親佩劍之腰霜雪呈華願近
生松之腹動則金章躍鯉靜乃寶匣盤龍既當屈以
求伸唯望服之無斲謹專寄獻遠表依攀伏惟恩私

特垂檢納

銀結條燈籠一枚

承燈蓋白盛荷葉一茶
木匣盛金銅鑲鑰並全

金花平脫銀裝硯臺一具

匣垂銅香囊五枚
盛金銅鑲鑰全具

金花平脫銀裝硯匣并硯几一具

銀硯水瓶等
四事硯几在

第二

內

右伏以持異物而奉異人嘗聆斯語覽遠書而愧遠
客亦驗古詩志常切於攀鴻事不慙於獻鵠每逢珍
玩則繫懇誠前件燈籠硯臺等鑄鏤成功披砂潤色
運巧而靈絲緞藻標奇而霞縹雕華高懸謂雲蓋凌
風遙視疑露盤含日龍膏豹髓偏宜卜夜於歡筵鳳

筆鵝牋亦可依仁於未席加以謝囊分掛孔硯深箴
虛心而只待含香蘊器而終能屢默是敢徵美言於
舉燭寄微慊於濡毫伏惟無思宋殿葛籠僻敦儉約
或逞張地草聖許近恩輝必可遠耀九光深滋五色
隔飛蛾而救物仁化弥彰研含麝以傳書德馨增馥
非無所採粗有可觀必望眷私俯垂容納幸甚云云

金花陷銀柘裏合大小共三具

銀接頭紅牙匙筋一十對

犀托子四隻已上大合內盛銀裝茶椀四隻在

盛內

犀標子二十片在小合內盛金花銀脚螺盃一

隻

右件是筋犀合茶椀螺盃等雖愧金盃粗勝棘七鈿
玫瑰之表異固讓魏銘詠玳瑁之標奇敢徵潘賦所
貴者煙排翠點霞冰纖條掌握增榮不慮劉使君見
失指蹤任意或希柳御史自攜况乃水族殊姿天成
雅器永免蜘蛛寄跡能將鸚鵡齊名稍謂珍奇遠思
寄獻伏惟靜籌帷幄許接罇壘對郭隗於高臺深傾
露液遣甘需於仙闕勝醉霞漿伏惟恩私特賜檢納
幸甚云云

織成紅錦綴壁兩條 暖子錦三疋

被錦兩疋 西川羅夾纈二十疋

真紅地絹夾纈八十疋

右件綴壁錦纈等龜城傳樣鳳杼成功張廣幅而宛
見虹舒疊綵繒而免慙鮫織雖五千里之誇步障則
難可爭光而四十疋之製戎衣則或堪入用亦冀脩
會稽守晝行之服搜平津侯夜寐之衾不咎輕微特
垂容納于浼斯甚兢慙實多云云

安南開海路圖一面

西川羅城圖一面 并八幅紫綾綠

右竊以事畏人知功慙自銜孟側奔殿終著美於魯
論却至驟稱果興譏於晉乘妍蚩可鑒今古何殊項
者銅柱南標金墉西建關八百里之險路則雲將驅
石雷師劈山築四十里之新城則水神滌泉地媪供
土蓋乃感忠誠於上鑒標壯觀於外藩敢言簡在帝
心實匪率由人力今則八變歸化萬乘省方既能有
備無虞亦所當仁不讓去年嘗傳雅旨欲覽微功乃
徵於墨妙筆精遍寫彼長途峻壘宛如縮地不止移
山遠遣寄呈略希展開必謂桂陽衛颯誠瑣瑣焉亦
知蜀國張儀是區區者恃深眷而不拘小節激壯圖

而無訝大言伏惟云云

徐泗時司空

物色

右伏以縞帶紵衣魯史乃先其所出投桃報李周詩
用表於相知永言沼沚之毛豈讓琅玕之寶蓋防闕
禮只貴申誠前件物等雖曰土宜亦由波及實慙華
麗况至勤微難把八行盡寫傳心之語唯憑一介聊
陳藉手之儀伏惟春私特賜檢納云云

田令孜軍容送器物

右竊以氣曠未銷道途尚梗久乖專信略達微誠每

憂於遠莫致之不敢以多爲貴者前件器物貨非難
得器寶易盈雖慙鏐銑之名願接罇壘之列輒將寄
獻遠表依攀伏望無掛意於四知幸流恩於一諾特
垂容納云云

振武赫連鐸尚書謝馬狗

右特蒙眷知遠有患賫無庾亮的顧之害有陸機黃
耳之能敢謂脩於左牽右牽實爲馴於執勒執縶寧
唯致遠况解防姦既驅策之有期固指蹤而無失仰
承重貺倍荷殊私末有報酬益多愧悚伏惟云云

幽州李可舉大王

青氈帳一口 金銅裝鉸具

右伏蒙恩私特賜惠賚委之專介衛以壯夫遙陟危途得張官舍不假棟梁交構能令戶牖今開出觀則一朶蓮峯入玩則千重錦浪加以頂標曉日額展晨霞靜吟而筠箔搖風俯視而地衣鋪雪舒卷皆成其壯觀行箴永佩於深仁莫不銜沙漠之奇摸駭江淮之衆聽卧龍竊譽固當高枕無憂虜豹成功必可運籌決勝唯期尅捷全賴庇庥荷戴所深啓陳何及伏惟

桂苑筆耕集卷之十

桂苑筆耕集卷之十一

檄書四首書六首

都統巡官侍御史內供奉崔致遠撰

檄黃巢書

招趙璋書

告報諸道徵會軍兵

告報諸道徵促綱運

答浙西周司空書

答江西王尚書

答徐州時溥書

答襄陽郗將軍書

浙西周寶司空書

浙西護軍焦將軍書

檄黃巢書

廣明二年七月八日諸道都統檢校太尉某告黃巢
夫守正修常曰道臨危制變曰權智者成之於順時

愚者敗之於逆理然則雖百年繫命生死難期而萬
事主心是非可辨今我以王師則有征無戰軍政則
先惠後誅將期剋復上京固且敷陳大信敬承嘉論
用戢奸謀且汝素是遐眈驟為勅敵偶因乘勢輒敢
亂常遂乃包藏禍心竊美神咒侵凌城闕穢黷宮闈
既當罪極滔天必見敗深塗地噫唐虞已降苗卨弗
宥無良無賴之徒不義不忠之輩爾曹所作何代而
無遠則有劉曜王敦覬覦晉室近則有祿山朱泚吠
噪皇家彼皆或手握強兵或身居重任叱吒則雷奔
電走喧呼則霧塞烟橫然猶暫逞奸圖終殲醜類日

輪闊輶豈縱妖氛天網高懸必除兇族况汝出自閭閻之末起於壠畝之間以焚劫為良謀以殺傷為惡務有大德可以摧髮無小善可以贖身不唯天下之人皆思顯戮抑亦地中之鬼已議陰誅縱饒假氣遊魂早合亡神奪魄凡為人事莫若自知吾不妄言汝須審聽此者我國家德深含垢恩重棄瑕授爾節旌寄爾方鎮爾猶自懷鴆毒不斂梟聲動則蓄人行唯吠主乃至身負玄化兵纏紫微公侯則犇竄危途警蹕則巡遊遠地不能早歸德義但養頑兇斯則聖上於汝有赦罪之恩汝則於國有辜恩之罪必當死亡

無日何不畏懼于天况周鼎非獲問之端漢宮豈偷
安之所不知爾意終欲奚為汝不聽乎道德經云飄
風不終朝驟雨不終日天地尚不能久而况於人乎
又不聽乎春秋傳曰天之假助不善非祚之也厚其
凶惡而降之罰今汝藏奸匿暴惡積禍盈危以自安
迷以不復所謂燕巢幕上漫恣騫飛魚戲鼎中即看
焦爛我緝熙雄略糾合諸軍猛將雲飛勇士雨集高旌
大旆圍將益塞之風戰艦樓舡塞斷吳江之浪陶太
尉銳於破敵揚司空嚴可稱神勇眺八維橫行萬里
既謂廣張烈火藝彼鴻毛何殊高舉泰山壓其鳥卵

即日金神御節水伯迎師商風助肅殺之威晨露滌
昏煩之氣波濤既息道路即通當解纜於石頭孫權
後殿俯落帆於峴首杜預前驅收復京都剋期旬朔
但以好生惡殺上帝深仁屈法申恩大朝令典討官
賊者不懷私忿諭迷途者固在直言飛吾折簡之詞
解爾倒懸之懸汝其無成膠柱早學見機善自為謀
過而能改若顧分茅列土開國承家免身首之橫分
得功名之卓立無取信於面友可傳榮於耳孫此非
兒女子所知實乃大丈夫之事早須相報無用見疑
我命戴皇天信資白水必須言發響應不可思多怨

深或若狂走所牽酣眠未寤猶將拒轍固欲守株則
乃批熊拉豹之師一麾撲滅烏合鷓張之衆四散分
飛身爲齊斧之膏骨作戎車之粉妻兒被戮宗族見
誅想當燃腹之時必恐噬臍不及爾復酌量進退分
別否臧與其叛而滅止曷若順而榮貴但所望者必
能致之勉尋壯士之規立期豹變無執愚夫之慮坐
守狐疑某告

招趙璋書

都統大尉馳問趙璋古人有言曰大厦成而燕雀相
賀湯沐具而蟻虱相吊審其賀之與吊由彼依之與

違且爾同惡相成異謀斯構遽爲犯順尚敢偷安今
我水陸徵軍天人助信久審風雲之會遠揚雷電之
威即當行展豹韜立擒梟師剋收城闕靜剋烟塵想
計爾曹具知吾意但以先春而後秋者天之道重賞
而輕罰者君之恩遂乃馳吾咫尺之書問爾方寸之
事爾等依憑大憝猾亂中朝罪已貫盈理須誅剪然
若黃巢狠性能改雄心自新望其國封建彼家社勲
業可超今邁古恩榮可付子傳孫必爲致之速相報
也如或塘螂努臂猘獠磨牙輒欲拒張必當撲滅爾
須審詳至理勸誘元兇欲令天下知名早申忠節柰

何草間求活終作叛徒况居成筭之中即在覆巢之下
下死生有命禍福無門唯審是非可知成敗所謂燕
雀相賀蟻虱相吊實在於知與不知順與不順良時
易失嘉會難逢生為有害之人死作無知之鬼深可
恥也深可痛也勉惟去就早剖指蹤悉之

告報諸道會兵書

中和二年五月十二日具銜某謹告某州府節度使
逆賊黃巢自亂天常亟移星律縱使擢其賈髮誥罪
難窮未能眷彼狄喉稔奸斯極神誅可俟鬼恠何憑
而敢鳴張鳳城熊據龍關至於五尺童子猶欲請纓

况在四方諸侯忍為投袂偶屬朝廷密施廣畫先倚
旬侯不勞十道徵驅必謂一麾蕩定豈料軍令雖殊
於兒戲將名莫驗於童謠未暇舉旗旋聆反旆遂使
犬猶狂吠猿不驚號徒招翫寇之譏孰擅弭兵之譽
聖上整飛日馭親省風謠陰暘行恩睿慮則雖勞罪
已募羶結望羣情則却恐後予然而自幸龜城久停
鑿輅秦雲遠隔蜀柳再芳每興霜露之懷聖情可想
未滅烟塵之患臣節何安某去年羽檄先馳牙璋後
舉唱義聲於遐邇養勇氣於偏裨於是廣徵陶侃之
軀久握辛毗之鉞盡鷁齊飛於雪浪檣烏高轉於烟

空必欲帆張曉風旗寢夜月纔離楚岸便到漢江直驅
背水之師永破滔天之孽而乃未施豹略頻降鳳書
已知諸道進軍不許遠藩離任詔旨云爲朕全吳越
之地遣朕無東南之憂是以再閱綸音遂回組甲蓋乃仰
遵帝命固非敢緩師期今則萬里專征誰能奮翼三
年縱敵尚許磨牙賊巢雖戲島中已居机上掘尾狗
子輒曾發狂斲頭將軍難可釋怒某聿忝握兵之要
固當仗義而行近奉詔條遍徵戎旅一呼巡屬四集
驍雄不唯被練三十實有控弦十萬已取今月十八
日部領兵士發離本鎮必得直趨汴道徑入潼關立

刻梟巢去迎鑿駕引舜風之無外覩漢日之再中况
都統王令公暗運智機別操戎柄已提勁卒即展奇
功足可相應軍謀共興王略諸道自從賊盛皆峻官
榮尸爲食上之毛盡思効命矧乃荷天之寵豈合安
身且大丈夫之在世也壯氣難申良時易失苟或美
事讓他人之手殊恩負聖主之心則莫測肺肝何施
面目固應各勤訓練同願誅鋤瞻帝輦而魂飛擁戎
軒而嘗裂早看行色勿懷兒女之悲須把戰勲永作
子孫之福謹告

告報諸道徵促綱運書

謹告某州節度使夫忠於國者無以家爲是故漢代
微臣有傾產助邊之請魏朝烈士有舉宗陳力之言
况乃邊寄榮身兵符在手遇大朝之多難見上宰之
董戎而不能役致泛舟令行挈畚使戰士猶多飢色
將軍未獻捷書但忝分憂實爲忍恥某昨從中夏再
集大軍不慙素飽之名已誓無譁之衆仍差都押衙
韓汶先費金帛百萬足救接都統令公軍前既裝運
舡將扣飛檄言遵汴道徑指圃田必值徐戎來侵淮
口扼斷河路攻圍郡城近者又擁兇徒直衝近境敢
憑蝟結欲恣鯨吞當道既見阻艱暫須停駐遂乃棟

徵驍勇往討頑兇仔靜封疆便登道路必可豁通網
運廣備供輸行稱東道主人非無意也立斬南陽太
守竊有志焉諸道久荷深恩各居重任縱以家門寶
貨猶合贍軍况將州縣賦興豈宜壅利其宜武忠武
天平昭義泰寧平虜河陽等道盡發雄師咸從統命
其依饋運各已通流其浙東浙西宣州江西鄂州荆
南湖南嶺南福建等道今欲踰年未聆發運若由水
路須入汴河如此稽留何因濟集必計杜畿美化遍
得人心任峻竒謀兼施兵力速請同勤饋輦繼發綱
舡齊至都統軍前早期收復京闕其徐州實為國靈

豈止鄰讎讎蓋以天暫容奸地猶聚惡昔為寵勛叛亂
早合賭宮昨因時溥猖狂更宜塗地偶屬朝廷未誅
大慙不問小瑕貴悅軍情驟加爵賞而乃時溥因遵
詔旨尚構奸謀去年曾犯淮山今夏又侵泗水乃作
黃巢外應久妨諸道進軍先須剗當路之豺狼後可
殄壞堤之螻蟻蟻使隋皇新路揚柳含春無令漢祖
舊鄉荆榛撲地凡承寵寄共察忠誠謹告

答浙西周司空

某自忽覽表示驚憤兩深是何見事之乖如此發言
之過且趙公約者背軍逃走行怯追擒遽投跡於貴

藩遂偷生於連襲今則異端斯構細作爲名若能懷
上士之心豈可信下人之口譚何容易事不酌量表
示云位極上公權尊都統別興異見遽起他謀以何
悔尤欲爲燒劫此乃稍殊雅責僅涉穢詞鼠尚有皮
蓋譏無禮駟難及舌亦誠慎言豈是不爲虛号誠非
所可道也司空晚歲縱不以學識爲從事雋才亦合
以智謀相贊虛成啗飯難望和羹未諭是非須陳本
末具標五信無所一疑且此三世立功無非報國四
方出鎮曾不安家身持將相之權手握恩威之柄豈
獨撫淮邊之俗終期安海內之人方切緝綏何言侵

伐其可信而不合疑者一也况今黃巾尚熾翠輦未
歸方驅貔虎之師欲破豺狼之窟遠離樊鎮深託善
鄰臨危而猶真依憑守靜而更除損害其可信而不
合疑者二也司空早聯中外水保初終言既馥於芝
蘭操彌貞於松桂曾無罅隙每有音書偏深魯衛之
情永絕張陳之事其可信而不合疑者三也浙西始
為交代未得多時陶公之官柳誰移召伯之遺棠不
讓至於賊壘猶將信義招降况是舊藩豈以兵戎侵
逼其可信而不合疑者四也昨自師過江浦令肅雪
霜軍門則擊柝夜嚴行路則銜枚晝靜豈有任從海

則登舫趙公約則隔簾通報既不難爲指麾又何易
得直至上流嘉客不瑕接迎是何下等健兒敢來親
近其可信而不合疑者五也粗申大較可察中心何
乃憑叛卒之讒詞失賢人之事體以此陳奏聖主以
此傳告諸侯非我無辭是誰有過細尋來旨莫測貴
懷爲當老耄所侵末年多變爲復狂迷偶作忠節遠
乖夫耳不辨五聲曰聾目不分五采曰昧司空文當
重寄已謂元臣因何妄發莠言或似自懷逢性不知
彭寵此時有按劍之疑却恐廉頗他日無負荆之處
噫將帥則空榮列土君王則尚遠蒙塵更無匡復之

誠唯有猜嫌之事祇隔一條水脉便興萬種風言必
計心虛遂成口實大凡獻酬以禮來往為書理失其
中事生非小且須審諦勿恣豪強於此難盡私誠其
他備載公牒無遺後悔併棄前功某白

荅江西王尚書

十二月六日某白閣下遠損長書深貽善諭一覽而
發皇耳目再窺而驚越神魂是何詞彩之彬彬能致
言端之懇懇既知約我以禮方信起予者商况乃事
徵於美里聖人道媿於首陽義士切磋雖至刻畫何
勝敬佩良箴專銘鄙抱然慮虛聲易應真寶難知美

唇吻以鑠金衆皆妙手拭瞳眸而辨玉多是清盲苟
非原始要終則必唱予和汝是以略陳梗槩用察根
源匪欲廣援古今所希暫曉左右僅同伐善豈免興
慙君其審之僕所望也僕與浙師周司空早於鳳里
相識亦為鷓原往還接載咲載言之時展如兄如弟
之分况作建興交代真為結綬相知既睦比鄰罷高
外戶江南江北祇闔行春三楚三吳盡喧來暮方謂
憑我友歲寒之節解吾君宵旰之憂豈料蒼烏高飛
翠華遠狩僕以久叨重寄便決專征偶緣兵力未加
人心尚攝遂於春首先發羽書仍請都統判官頌雲

協律議共成之事謀相見之期固非閱被廬之軍徵
夾谷之會實欲親謀歃血方寫痛心若能接濟師徒
粗得振揚聲勢而乃周司空却自棄同即異不能捨
短從長忽疑惑於澠池謂矜誇於踐土便見戒嚴城
壁阻塞津途搆猜嫌而信有小人遺故舊而曾無大
過僕雖達彼怒但守吾真及至中夏出軍外方多事
真安獎鎮劾倚近鄰又合幕客過江請爲都統副使
豈銜弓旗之禮邀辟元戎祇憑鉄鉞之威撫綏近境
周司空確乎阻意莞爾興譏不從固請之言自惜有
餘之刃類移曩顧但積沉猜見此初屯下瀨之師未

設中流之誓猶淹水道久候天風軍聲既振於四鄰
人意自防於兩岸偶有背軍官健趙公約者走投浙
西鈞以巧言構爲細作便移長牒妄說異端其書云
位極上公權尊都統別興異見遽起他謀以何悔尤
欲爲燒劫僕以趙襄子之忍辱念茲在茲蘭相如之
慎微有始有卒遂馳書牒具述事情聞司空尚發悉
言自懷怍色與宣護景虔貞徐師時溥者暗資積釁
相應密謀各興梗路之兵戈遍告松江之郡邑以至
練成戰陣鎖斷征途僕若不辭險阻之虞必致殺傷
之患坐甲而未期破竹迴車而用待負荆尋屬繼奉

絲綸不令離鎮遂驅組練却已班師雖云帝命斯遵
實乃鄰兵所阻彼宣州者亦有府因春初寇犯黔州
勢侵旬水况值前廉已去新帥未來既無禦捍之權
恐落奸兇之便遂差押衙馮綬暫令安撫郡城蓋緣
曾奉詔書特許便宜從事凡於制置得以指麾景德
貞常侍殺麥不分蘭猶莫辨謂言專輒遽有侵凌殺
害軍人劫掠財物憑綬幾臨死所劣得生還自此隋
國悉興謝城信絕將投彼鼠其如有礙之時欲償於
豚又是無端之事且為含忍未及通和必知橫彼織
羅巧成貝錦傳之手遠誰曰不然噫滔滔者天下皆

同君子所恥泛泛如水中自樂壯夫不爲但問事之
若何則知曲之在彼今則特垂教督益驗契憐自緣
有理可申豈便無辭以對固非飾過不敢憑虛莊生
不云乎其智適足以知人之過而不知其所以過若
非辱殷勤之旨何以息睚眦之詞僕也不能嫉惡如
讎唯以用和爲貴但以賢愚共惑本末未彰復書而
不覺詞繁比事而終慙理短身修三省勉尋曾子之
規心敬一言永荷伯陽之惠幸垂鑒志某頓首

荅徐州時溥書

六月十六日某白僕射之下特辱長牒仍移公牒細

詳來旨頗涉多端有同戲以前言無乃驚於衆聽雖
倚兵強力壯其如作僞心勞且泗州舊隸仁封新標
使額固非郡守專輒蓋是朝廷指揮為在頃年獨全
忠節遂編名於防禦永傳賞於驍雄近者久結鄰讎
蓋遵國典獨行直道固守危城嘗膽爭先斷頭非苦
此亦古人云寧為忠鬼不作叛臣之義也况于尚書
有定國恩威有栗磳武勇自安疲俗甚洽羣情每將
勾踐單醪均沾無黨不獨臧洪薄粥分啜有餘固當
散三年之儲充一日之費宜能敵衆安可待勞豈比
於築室反耕杜門却掃者哉忽覩來示云泗州獨阻

淮河自牢城壘使四方多阻諸道莫通而又每於朝廷妄為訛謗今有城中將校潛來計圖請少振兵戎即便期開泰者大凡人事莫若自知是下去年忍勢不禁求榮頗切暫奮橫行之氣果成順守之權是以累受國恩遠膺藩寄豈可尊身忽物是已非人偏致嫌於簡生終歸過於季氏其於淮河久阻道路不通皆因貴府出兵不是泗濱為梗是非可辨遠近所聆去歲夏初早蒙侵伐呼蟻軍於漣水拒虎旅於淮山此緣將援親仁難逃善戰爰謀薄伐用救倒懸君異荀吳莫振受降之譽僕慙呂布有虧解圍之言泗州

以實奏陳豈爲諂讒僕也雖慙知己嘗敢薦賢亦曾
錄詔寄呈必合垂情見悉誰料既踰望始翻起曩端
甲兵繼興疆場頻駭所云泗州城中將校頻來計圖
此乃巧飾虛辭通行長牒盡知譎詭孰肯詭隨朝廷
以足下身處雄城刃多餘地委摧網運異濟權宜但
自戢歛兵車必得通流饋輦今則却云奉朝廷意旨
收徐泗封疆廣出師徒難窮事意必若足下訓戎勇
銳報主忠勤何不親摠全軍往殲巨慙早立非常之
効以酬不次之恩而乃知僕再次西征即謀北渡便
侵泗境來犯淮堦負國家之寵榮搆州縣之患害幸

其賊勢阻此師期未諭雅懷何辜聖獎言但繁於枝
葉事莫究於根源來示又云比皆廬州海州皆爲背
叛累來投款不遣措詞者強謂恩情形於書札顏雖
不厚心且何安彼東海廬江偶聚奸惡異端斯起既
非鄭有人焉同氣相求盡是跖之徒也足下已居重
任不徇危謀自守詔條何煩飾說僕累將軍食類救
臨准爲分逆順之蹤令保始終之志實以泗州曾非
杞子之無禮亦類展禽之有詞每當告急告窮唯以
行仁行義唯望足下暫息餘怒深量遠圖且先報國
之誠無急伐鄰之後無覩詔書獎諭請與忠武協和

是見睿情俾銷微憾在於臣子合更慎思求將安撫
氓黎速自追迴士卒苟或上負君命下違物情隔礙
征途侵凌近境則亦難辭借一用試當千必見傷禽
易驚困獸猶闔悔須防後險已居前矧乃泗州以扼
節為命貴鎮以翫兵為務泗州則唯遵王化貴鎮則
虛構牒詞以較否臧可知曲直是敢速申忠告冀絕
後誣正當聖主蒙塵未除禍難何忍諸侯列土更起
兵戎猛發忠言懶為諂笑勉思大體勿暴小瑕必因
此日所箴却得後時見謝幸從誠信無損功名某官

某頓首

荅襄陽郗將軍書

中和二年七月四日具銜高某謹復書于將軍閣下
某側窺前史嘗慕古賢贈人以至言則老聃垂誠成
我者良友則管仲知恩但恨季俗寢訛芳規僅喪宣
期今日得覩餘風將軍唯恐掩瑜欲令磨玷特勞彩
翰遠辱長牋初尋歸美之獎詞汗驚浹背後覽扶危
之箴諭淚迸沾頤既乃粲然可觀焉敢率爾而對輒
憑毫素仰䟽血誠終冀恩私略垂採覽幸甚幸甚某
自去年春知寇侵秦甸帝幸蜀川欲會兵於大梁遂
傳檄於外鎮練成軍伍選定行期便被武寧忽興戎

役先侵泗境後犯淮壩聲言則狼顧舊封實意則鯨
吞孽鎮長驅猛陣直犯近疆是以分遣偏裨果殲完
醜及當中夏乃出大軍既知其址路阻艱遂決於西
征利涉尋奉詔旨云卿手下甲兵數少眼前防慮處
多但保淮南之封疆協和浙右之師旅為朕全吳越
之地遣朕無東南之憂言其垂功固亦不朽某以兵
機固難自滯君命有所不從已事征行必期進發占
風選日只欲奮飛又奉七月十一日詔旨云諸道師
徒四面攻討計度收剋旦夕可期卿宜式遏寇戎饋
輦粟帛何必離任則是勤王或恐餘孽遁逃最要先

事布置以此再承綸旨遂駐舟師唯廣利權宜供戎
費殊不知進退唯命是役無虧却被近鎮讒誣聖朝
猜慮食馱驥之良肉何敢望焉絆騏驎之駿蹄無能
爲也遂使忠誠未展睿獎難期非敢自辜海內之人
心但養淮邊之兵力詢之於理良有所因將軍以泗
州舊屬彭門謂其妄爲占護必慮未詳狡計或採浮
詞且徐州昨自併張更無戰歛威權既盛暴虐轉深
見其自五月初再謀征討已排勁卒欲援令公無差
都押衙韓汝先喪一百萬貫救濟都統軍前盡載舟
舡將臨道路又興兵甲來擾疆陲把斷淮河簇成寨

柵是以行計猶阻羣情莫安細察徐州所爲是作黃
巢外應不然則何以每見當軍臨發即將兇黨奔衝
又乃執稱泗濱阻絕汴路且臨淮則城孤氣窳劣保
疲羸彭門則地險兵強恐行狂悖以茲斟酌可見端
倪况無諸道綱舡曾過泗州本路今則皆因此寇却
滯諸網近則浙東浙西遠則容府廣府並未聆饋運
何濟急難某見簇楚師俾誅餘孽一則遵行詔旨救
援鄰封二則得靜長淮欲登征路固非貪泗民之租
稅排徐師之兵戎盖分曲直之端將保初終之節泗
州二年閉壘一境絕烟織婦停梭耕夫釋耒滿城軍

食猶仰給於弊藩關郡賦與固難徵於疲俗將軍謂
某藉其地利構此鄰讎細閱來言難知深意泗州不
獨咸通之際得振雄聲曾於天寶之中亦遵直道况
于濤尚書政條既舉武略兼精收百姓之歡心得三
軍之死力將軍便令棄而不問理復如何徐州實有
大憊固非小患若將助虐豈謂輸忠某今所俟者戮
當道之豺狼奮乘秋之鷗鵠星言夙邁電擊專征必
與王令公腹心見知首尾相應齊驅虵陣豁展豹韜
剋復上京奉迎大駕亦不敢負秣陵之節度爭強弩
之功名所冀得繼前勞自防後患使蘭相如之謙德

不損雄威費無極之讒徒皆歸顯戮捨此之外餘無
所云敬佩良箴豈離愚抱伏惟鑒察某再拜

浙西周寶司空書

昨奉公牒云當道臨淮叛卒過江來投集衆廣場已
受降訖三復來示言難不酬且降之爲名其理甚大
虞舜之七旬苗格晉侯之三日原歸此皆以干紀亂
常起兵動衆緩之則稔成患害急之則橫致殺傷遂
假小慈終施大信能敷德化俾革奸兇若有偶聚雀
蒲散為榛梗者共須撲滅勿使晏安今相公幸此鄰
災樂其軍禍莫能嫉惡翻欲惠奸恐乖拔鉞之威虜

銜倒戈之捷且如去年陳儒徒伴唐突貴鎮封疆僅
有六萬餘人宣州日告危惡此時相公何不招諭致
令侵凌却見瑣瑣頑兇即自勤勤誘引莫測高旨實
辜衆心傳不云乎召 外盜書不云乎爲逋逃主稍
詳至理無信虛詞昔漢朝匈奴叛黨來附景帝便欲
与之封周亞夫曰彼背其主而見賞何以責人臣之
節以小喻大可量事情况臨淮一郡早從淝上行營
及淮邊戰敵每有優賞曾無偏頗自是臨財則競起
貪心遇賊則皆無鬪志旋爲逗撓猶與矜寬昨又請
換都頭已依衆請殊不知犬易興於狂瘼豕難制於

喧逐未盡誅擒便謀奔竄幸且未離近境固合同塞
奸源在此既已不忠於彼亦應非利石祁子所云天
下之惡一也惡於宋而保於我保之何補其在茲乎
况凡鄰府事宜一彼一此互相救援同致安寧是以
前年六月中貴鎮有天平潞府元從兵士背叛奔逃
數僅百人爲患非小遂蒙移牒請爲追擒當使羌都
將梁楚部領馬軍所在討襲并各帖管內諸州令差
精兵同力捕逐尋即諸鎮及東塘遊奕使相次收獲三
十八人纔見擒來便令押送續得梁楚狀報到濠州
界起及殘孽殺得三十餘人其餘漏網之徒盡以傷

弓而走所生擒之兇黨皆就戮於貴藩能致彼之快
心實賴此之勞力今則却見臨淮叛卒特向公江招
呼便稱受降仍補職累牒咨請不送過江蒐慝何
多養奸斯甚敢言以惡報德實恐在安忘危詩云投
我以木瓜報之以瓊琚匪報也永以為好此乃國風
遺訓昭晰可觀相公通仁略賜詳度無自賈天下之
戮吠也其他已其迴牒伏惟俯賜昭察

浙西護軍焦將軍書

昨有臨淮背叛兵士誅擒不盡奔迸過江便蒙貴鎮
相公特許歸降遍加補署兼移公牒頗搆虛詞既乖

七紱之謀誰謂三驅之禮蓋是幸灾樂禍固非撫士
安人自古受降之為義也叛而伐之服而捨之忠信
能敷德刑乃就或以賊數則動盈千萬奸謀則難測
二三若欲戰爭恐多傷殺或吹笳感動或書箭招呼
免致膏鋒俾從肉袒其或叢余兇狡率然叛離免奔
岡而終必自顛鼠失穴而欲將安往在於接境合與
同擒不料豁開叛換之門深作逋逃之藪慰安螻蟻
雖欲好生訓練熊羆有何用虜纜招稔惡之輩遽銜
受降之名蘊豹韜而略不施張對龍節而恐復慙愧
魯史云晉楚設誓無相加戎同郵灾危備救凶患若

有害楚則晉伐之在晉楚亦如之交贄往來道路無
壅謀其不協而討不庭此則古時敵國猶保詒言今
日善隣豈傷師律况晉楚則各在遠地揚潤則只隔
長江曾無交惡之端豈有相欺之事實驚衆聽甚爽
遠圖已無蚕女爭桑永安兩境宜效農夫去草靜刻
本根伏惟將軍遠護兵符共成王事必不欲和之如
響知而不言唯望稍致良箴終除巨弊永使必誠必
信誰云莫往莫來此既無噂咻以背憎彼亦免忸怩
於顏厚幸垂採聽特惠終始伏惟云云

桂苑筆耕集卷之十一

桂苑筆耕集卷之十二

委曲二十首

滁州許勅

昭義成璘

廬江縣令李清

淮口鎮李質

光州李罕之

楚壽兩州防秋迴戈將士

歸順軍孫端

楚州張雄

楚州張義府

滁州許勅

壽州張翱

廬州楊行敏

和州秦彥

廬傳

戴廬

光州王緒

楚州營田判官綦母嶺

鄆州耿元審

海陵鎮高霸

淮口李質

徐州許勅委曲

報許勅得狀知妻劉氏將從征討願效勤勞嘉尚之
懷諭言不及吾嘗晚後魏書見揚大眼者武伎絕倫
戰功居家其妻潘氏頗喜騎射至於攻戰遊獵之際
潘亦戎裝齊鑣並驅及至遠營同坐幕下對諸賓佐
笑言自得大眼時指諸人曰此潘將軍也吾思見若
人為日已久不期今夕得舉妙才此亦可謂劉將軍
矣想鼓鞞方振琴瑟相隨既在同心可知竭力教戰
則必欺孫武解圍則可假陳平勉致殊功即行懋賞

悉之不具云云

昭義成璘

報成璘大夫魯史云臣一主二漢書曰一心可以事
百君則知下有離心蓋爲上無全德姪孫僕射夙虧
家訓駮荷國恩累忝藩方曾微績効每於撫俗略不
隨時恩威豈得並行寬猛無由相濟况近關西之賊
窟持山坵之兵權戰伐既勞緝綏莫至固知軍情潰
散物議喧張大夫名既超倫事能從衆息貔貅之憤
怒慰黎庶之疲羸實謂有三雋才誰云犯五不韙古
之所有今也何疑遠遣專人迎取家口儻或行程艱

齧且令彼處婆婆如能斷送出來便與友持發遣一
跣墜履猶能牽念舊之心百口孤孀何忍見含愁之
色必應慰暖免至飢寒倚望所多諭言無及彼但勤
修政理行荷寵榮不令外盜侵凌必見大君委寄冬
寒慎為將息節級各與安存悉之

廬江縣令李清

報李令昔有桓榮祖者少曾學武或曰何不學書答
云上馬橫槊下馬談經方可謂不負飲食矣若無自
全之伎何異於犬羊乎昨見所申衆情可獎昔也一
百里之疲俗託在神君今則十八岩之義兵請爲軍

師若非寬將猛濟惠與威行則何以鯁鯁懷仁各能
遂性態罷聚黨盡得降心姑拋堂上之琴便握匣中
之劍所謂文一變而至於武者也况李令族聯天派
名比水源才機為一代之雄心術是萬人之敵足得
以指麾銳卒掃蕩叛徒不惟除郡邑之灾亦可定國
家之難然而軍務既常獨理職銜須有可稱未見所
求固難抑致為復願兼知戎役却守縣曹為復欲改
轍從知乘機立事察斯二者決取一途專期奏論早
與飛報且如班超投筆崩恩捨藹當池蛟得水之秋
有天驥追風之便古詩云寧為百夫長羞作一書生

信知個儻之人懶守低徊之節勉成勲業永荷寵光
戎務方殷善自將息諸寨將士各與慰問悉之

淮口鎮李質

報李質覽所申狀慰愜良多李再興未革狼心敦張
蜂目構稱虛事違負本軍初憑逐寇之名却設起戎
之計賴質深懷智策善審兵機一唱義聲四圍逆黨
狀疾風之掃危葉如烈火之蕪飛蓬再興將見誅夷果
當懾竄然既是傷弓之物必為累鼓之資無知質男
裕黃口小兒血氣未定偶虧嚴父之訓以涉叛夫之
謀質又徇公絕私捨曲取直愛而知惡義以滅親削

其舐犢之吉遵彼烹臯之理若非忠勇何得如斯古
語有之蝮蛇在手則壯士斷其節是乃忍小痛而除
大患也况石碣傳芳於魯史日碑載美於漢書故事
斯存令名不朽足以見質有大丈夫之氣有真君子
之心權兵而動必成功鎮境而靜能守節前勞後効
日就月將固當榮盛可期勿以滯淹爲恨勉安軍旅
善保勲名以古况今惟吾知汝悉之

光州李罕之

報李罕之成隲有言彼丈夫也我丈夫也然則成功
立節不獨古人杖順輸忠正當今日近奉勅書手詔

無非激勵衆心無除王令公充都統西門軍容充都
監此乃藩鎮功虧朝廷計盡遂將大任專付老儒雖
漫傳聲必難濟事此去年齊驅猛銳將掃頑兇尋奉
絲綸俾安淮海詔書云爲朕全吳越之地遣朕無東
南之憂遂乃旋師不敢違命然則審詳物議叅酌軍
期關中有執斧之徒閭外無枕戈之志誰能竭力實
可痛心吾若不行衆將焉往今欲直趨汴路便入潼
關佇復鳳城奉迎鑾駕永使流傳萬代終能肅靜四
方罕之已處分憂久爲養勇必欲揀精練銳以期伐
叛摧兇今錄勅書手詔白寄往仰窺聖旨必勵忠誠

便決征行共圖富貴時不可失吾子勉之故此告知
速宜飛報悉之

楚壽兩州防秋迴戈將士

報王承問等久勞防戍又復戰征知得遠歸良多慰
愜詩稱束楚不免怨思傳載及瓜亦嘗憤恚古之難
事今見忠誠况承問限過三年訓齊一旅值國家之
多難息鄉井之懷歸言下忘身軍前効命遂得永別
伍符之列高登八座之榮固知實勤宜慮虛擲且往
年被練而去今日衣錦而迴孫權努力之言已成顯
驗王昶寶身之誠更慎操持深秋遠行善自將息節

級將士遍與安存遣此不具

歸順軍孫端

報孫端將軍自從歸投久處閑散想多鬱悒不暫弭
忘但以端職秩已高官資須稱使司累具奏薦朝廷
則有指揮且仰安撫師徒行迎恩命古人貴其晚達
君子誠其速成王化既無偏無頗寵章必盡善盡美
勉期順守勿念躁求秋晚其涼切慎將息節級遍與
慰問悉之

楚州張雄

報張雄中丞得狀知己點練兵士無請出軍西去討

逆賊徒憤氣勃興忠詞懇切覽之嘉歎深寘于懷且
每值寇戎稍侵疆圉雄心騰勇略首唱義聲去年
已建殊功今日又申丹請不辭危於馬革願使用於
豹韜實謂起予者雄始可與言兵已矣則帝委之以
郡侯吾待之以國士永揚茂績固在良時然彼州司
事力猶困未可便謀征役且宜更候指揮兵士各與
慰安秋深善自將息馳此不具

楚州張義府

報張義府得狀兼送罰錢引咎自責之驗用心古語
有之人誰無過過而能改善莫大焉饋餼之儀春秋

所重在於屬部豈可外交勿為飢則附人別欲申於
知已將滅白圭之玷遂以金作贖刑細覽表詞似懷
他慮庸受之愬固不行焉但慎始終永圖富貴悉之

滁州許劾

報許劾語曰兵食可去無信不立則知守信之道乃
是立身之本歟苟若壞隳自為顛覆訪知近日浙西
周相公頻差上元鎮使馬暨專賫書曲兼將金銀送
到和州說誘秦彥令歸浙岸許授霽川信使繼來事
情甚細則未知秦彥終欲如何且浙西素乏勲勞驟
沾恩寵謂得長久遽為驕矜殊不知人盡指搯鬼多

瞰室惡既天稔道唯日亡今更阻絕我通津動搖我
屬郡已乖衆議可見前途以勅直木千尋精金百鍊
固無憂於邪曲終不改於貞剛况乃邦媛相隨家肌
是保永除異慮必享同榮或恐未審浙西所為先此
告示悉之

壽州張翺

報張翺知己部領兵士將赴令公軍前言念遠征倍
所加念且杖鉞者皆誘聞外分珪者略滿囊中而乃
碩家產為遠圖剗國讎為閑事唯矜肉食孰肯身先
今則翺首唱義聲躬提銳卒騁大丈夫之志氣副上

宰相之指蹤况知素蘊機謀久施訓練行伸壯節必
樹奇功當五馬離鄉遠地之芳聲獨振及六龍歸闕
前程之變化難量暫此苦辛善為將理今附衣段銀
器茶藥等往到宜檢領春寒慎為行李將士倍與慰
安馳此不具云云

廬州楊行敏

報楊行敏使至得狀送芝草圖一軸覽之嘉歎喜有
餘懷且草木之祥異也雖自天成皆因地秀物有所
應吾何以堪行敏始假郡符已彰瑞謀天其誠爾爾
宜慎之况鄉號千年村名穀祿足驗一百年之壽與

二千石之資固保前程之富貴矣將酬美既更勵忠
誠非悵獎詞慮驕銳志悉之夏熱切好將息使迴附
此不具云云

和州秦彥

報秦彥尚書使至得狀無送羊五百口勤誠斯展其
數實繁所謂介羊來思我愛其禮况彥雖榮建隼能
効懸魚遠傳廉慎之名深舉撫綏之政而乃特申懇
悃倍所歎嘉既無慮於觸藩勉致功於荷篲使迴附
此不具

盧傳

報盧傳殿中監裴尚書將到洪州武寧縣人吏百姓
及僧道等狀舉論傳前後戰敵賊徒保全縣邑功績
一十五件細覽事實慰愜滿懷傳不云乎公侯子孫
必復其始傳能資餘慶無怠聿修自值危時便揚壯
節一呼義旅四討兇徒兄弟二人義聲俱唱遂得疲
乏獲賴廉使見知始提百里之權尋假六條之寄忠
誠所至寵命非遙勉慎始終懋圖富貴所希薦舉必
不弭忘悉之

戴盧

報戴盧殿中監裴尚書經過彼縣日得百姓僧道等

狀舉論慮自乾符五年主鎮無知縣事課績一十三
件事皆據實情切舉能詞理燦然良增慰愜盧竭誠
報國傾產妾家紉集義軍訓齊宗族撫寧羸瘵捕襲
寇戎六年于茲一邑獲賴有功不伐唯善是從遂領
縣曹水安鄉黨古者田稱績命邑踰義興求之於盧
未足多也既增嘉歎不忘薦論勉保忠誠終邀美命
悉之

光州王緒

報王緒天不容好人唯助順苟違至理必亂常刑知
緒昨因顏璋久藏榻心果致衆怒璋既誅戮緒乃奔

逃何不束手戎場投身義域而敢更謀嘯聚尚恣喧
張自招相鼠之譏莫識牽羊之禮未知爾意終欲奚
爲此乃先惠後誅武經所重好生惡殺王化斯行豁
開誘善之門俾躡歸仁之路遂加誨諭試問端倪速
仰割指本情指陳他望待詳來狀即與指麾禮云志
不可滿傳曰惡不可長緒之今日其意若何勿驅齊
豕枉入罪網秋冷切好將息節級各與慰問悉之

楚州管田判官綦毋頌

報綦毋評事夫欲均調兵食固須妙選公才供億既
多料量非易評事自匡郡政甚洽物情剗割而案無

滯詞淬磨而筆有餘刃今委無判順國軍糧料舉牒
同封寄往孔聖猶爲委吏蕭何亦作功曹唯託幹能
無辭猥屑欲令小人懷惠佇者君子勞心悉之

鄆州耿元審

報耿元審古來名將多是耿家恭賈秉弇徽音相繼
永言苗裔固瞻機謀元審雖名異霍聲而志能獨立
佇申忠勇別竦恩榮况逢危難之秋實建勲業名望
勞之日勉存終始慎守行藏其他並令樊谷面述今
寄衣一副烏黼茶二斤到宜一一領之秋涼切好將
息悉之

海陵鎮高霸

報高霸得進奏院狀報知轉授右散騎常侍永言欣
愜濡然滿懷昔周盤龍破膚有功繼霑爵賞齊世祖
戲之曰卿者貂蟬何如堯鰲對曰此貂蟬乃自堯鰲
中出耳當時以為名對前史標之美談今此官榮實
彰君寵唯在專勤戍邊固守邊陲更俟大來永揚忠
節知之

淮口李質

報李質得進奏院狀報知質轉授右衛大將軍且自
數年君恩溥合官榮職賞可謂均沾然而成功可為

受爵無愧者屈指而數能復幾人唯質父戍淮壩遠
防寇孽勤勞最至品秩尚卑今授大將軍之名乃滿
烈丈夫之望更宜慎守無慮湮沉慰愜歎嘉不離懷
抱遣此不具云云

桂苑筆耕集卷之十二

桂苑筆耕集卷之十三 舉牒廿五首內行墨勅牒詞五百

授都將右散騎常侍

授盱眙鎮將鄒唐燕御史中丞

授楚州刺史張雄將軍 授高霸權知江州軍州事

許勅妻劉氏封彭城郡君 請節度判官李瑄充副使

請副使李大夫知留後 請高彥休少府充鹽鐵巡官

請泗州千濤尚書充都指揮使 王蔭端公攝右司馬

右司馬王蔭攝鹽鐵出使巡官

前邵州錄事參軍顧玄夫攝桐城縣令

海陵縣令鄭杞

前宣州當塗縣令王翺攝揚子縣令

柳孝讓攝滁州清流縣令

前浙西館驛巡官鄉貢三傳張咸又攝山陽縣丞

前婺州金華縣尉李涵攝天長縣尉

前潁上縣主簿鄭綬攝盛唐縣丞

諸葛殷知榷酒務
李昭望充奉國巡官

柴巖充洪澤兩塘巡官
許權攝觀察衙推充洪澤巡官

王榮端公知丹陽監事
臧濬知鹽城監事

趙詞攝和州刺史

行墨勅授散騎常侍牒詞

勅淮南節度鹽鐵轉運等使東面都統兼指揮京西
京北神策諸道節度兵馬制置等使牒某官乞右可
檢校右散騎常侍餘如故如將軍須言負外置同正
負牒准今年二月九日詔應諸州有功刺史及大將
軍等如要勸獎者從監察御史至常侍便可墨勅授
訖分折聞奏者大君降命元帥從權但云能立勤勞
特許先申獎勸漢祖則手無刑印不阻論功武侯則
心若懸衡必能舉職用示軍中之賞式資闕下之恩
前件官夙蘊壯圖久從戎事將救奔沉之患固憑擒
縱之能桓榮祖之馳名不唯馬稱周盤龍之受爵乞

稱貂冠事須准詔授檢校右散騎常侍仍具申奏并牒如者故牒

廣明二年六月十二日使無都統檢校大尉平章事燕國公授盱眙鎮將鄒唐御史中丞

牒准詔云云將軍分間大夫出疆可專未請之權况奉已成之命高懸懋賞用報竒功前件官銜繼白猿名齊赤兔夙歸信義備察忠良雖遷柱下之官尚憐軍中之望宜昇專席更勵枕戈爾其心保清庶好對暎淮之月力誇驍銳無慙破浪之風事須准詔行墨勅授御史中丞

楚州刺史張雄將軍

牒准詔云云見功必賞漢高祖之殊恩承制無疑鄧
司空之故事前件官材標落落韻稟錚錚自假使符
已揚政績理股肱之名郡登耳目之高官信義相從
功名愈振佇檀外臺之寄宜昇大樹之資爾其益勵
忠規仰銜成命用副劉弘之善舉無嗟李廣之難封
事須准詔行墨勅轉授右武衛將軍負外置同政

授高霸權知江州軍州事

牒准詔應諸州刺史如有軍功卿量加爵賞如有罪
把卿宜書罰別差人知州具狀申奏者大元帥之權

既資成命古諸侯之任宜選良才前件官蛟躍池中
虎蹲岸上用軍以義守節唯忠不辭白刃之危累挫
黃中之衆或短兵鬪勇或圓陣呈奇動有所成往無
不利今以九江闕牧一郡思春將活疲甿固憑幹吏
爾其遏強撫弱削弊蠲苛無登庾亮之樓空知翫月
好把袁宏之扇且學移風稍展政聲佇沾恩命事須
准詔行墨勅差知江州軍州事仍具事由申奏并牒
知者

許勅妻劉氏封彭城郡君

牒奉處分古者官至大夫室稱命婦遂有後夫之貴

乃爲處世之榮而况靜則能慎內言動則克從外役
躬擐甲冑志凌雪霜功名既異於常流封拜豈拘於
成命以滁州刺史許勅妻劉氏英才天授貞節日彰
平欺後魏將軍洛陽失行仰慕聖朝公主司竹興兵
一昨專命良夫討除叛卒遽陳丹赤固願同征手驅
組練之羣速攻城壘身脫綺羅之色久犯氛埃四德
有餘六韜可試豈獨家之肥也實謂邦之媛乎夫既
冠其銀鑰婦宜榮於石帘豈可使松標峻影早致凌
雲蘿抱柔姿猶嗟委地先行及賞用報前功軍中之
舍爵策勳與人從欲天上之錦綵鈿軸待鳳銜來事

復准詔行墨勅封彭城郡君仍表次錄奏并牒知者
請節度判官李綰大夫充副使

牒大夫天芝粟秀霜桂含貞耐余芳猷每見用和為
貴凜然直氣終能嫉惡如讎信知賢良實救凋弊頃
者再握一同之政曾標三異之名既發縣花佇分郡
竹而乃鷗鵬自滯羔鴈相從鉅野卑拙劍川遠役察
俗而唯資婉畫犒師而不乏豐儲果得入奏玉墀出
懸金印泊某暫臨江陸旋鎮海門永言移節之難咸
假運籌之妙一來淮甸四換星霜判官德以潤身固
為已任恩能濟物不欲人知查事實繁在公匪懈筆

直而吏多畏色鞭輕而獄絕寃聲見君子之盡心實
古人之用意十二年之弘益久而彌芳千萬里之追
從永以爲好雖將徐榻別致猶恐燕臺未高今已假
小秩宗兼大司憲不遷職位何稱官榮幸屈跡於副
車真揚威於戎幕陳寵宣詔條無失嘗賴功曹呂虔
致郡俗永安亦憑別駕若言今日彼在下風事須請
攝節度副使表次錄奏

請副使李大夫知留後

牒大夫劒橫天外珠媚水中雄稜則仰映浮雲溫潤
則菊無枯草深歲利咒久佐遠藩每施婉婉之謀共

化蚩蚩之俗五鎮相倚一紀于茲嘗於折獄按刑唯
導直道維至旬休節假不離公門敢言知己之難實
荷成人之美今已三年翫寇尚恣俯張十道徵師遽
相逼撓若不專征鈇鉞何因倒載干戈遂驅養勇之
鋒佇破稔奸之窟代行拙政留託長才慰八郡之疲
羸察四鄰之動勦冀使表宏黎庶粗識詠謌無令陶
侃賓僭只耽閑戲數年卧理今日出行皆資禪助之
功聿保始終之惠事須請知觀察留後

請高彥休少府充鹽鐵巡官

牒少府學麟成角詞鳳傳毛偶輕桂客之遊暫樂梅

仙之白鶴唳而月籠寒野萬里清音鵬飛而雲斂長
天九霄高躅韋聯宗黨得接微猷敢興念於維駒無
見辭於絆驥稍假縱橫之術終直幹運之權雖慙燕
國之金臺願接謝家之玉樹同姓必親於異姓今人
何讓於古人事須請攝鹽鐵巡官表次錄奏

請泗州于尚書充都指揮使

牒尚書洞究儒經旁探武緯指清途於萬里牧遠羣
於三年旗者隼飛輶待鹿挾慰疲吐以仁政捍寇盜
以智謀克歸合浦之珍曾散曲堤之衆今者徐戎遺
燼敢恣侵凌楚卒精鋒佇期掃蕩終免致包胥之哭

况非奪晉鄙之軍但以鷹犬呈功能罷就列復俟指
揮之命仍申搏噬之能實託威權遠希統攝俾瞻馬
首皆知進退之宜永滅集聲用審否臧之律事須充
都指揮使其應援諸都及寧淮盱胎淮陰等三鎮將
士悉受指揮

王蔭端公攝右司馬

牒端公烏衣茂族鶴鬣清流早列官榮頗精吏術口
中金石常聆直韻之高手下銅鹽曾展長才之妙事
既同於外舉理無愧於旁求今則秩挂方書職參典
午雖云承乏且欲試能憲府威稜他日見豺狼懾伏

郡庭閑散此時樂魚鳥留連事須奉攝右司馬

右司馬王祭端公攝鹽鐵出使巡官

牒奉處分且權筦之設也本資戎事將贍軍須既當
薄伐之期實藉均輸之利能成重務固選良才端公
韻振維山慶流淮水靜處五常之域勤尋六義之門
每覽緣情備知守節繼委當仁之任皆傳幹吏之名
已爲應試諸難可謂多能鄙事今以仰裨國用効濟
兵儲權課方殷旬猶匪易官居典午既已優閑志在
推公無辭冗屑佇縻幕職立展籌謀雖見玉晞長寄
心於方外何妨裴楷暫勞力於俗中事須請攝鹽鐵

出使巡官句勘當司錢物

前邵州錄事參軍顧玄夫攝桐城縣令

牒前件官善水無壅譙山自高腹飽詩書口含鋒刃
厚利唯勤於耕道閑情素懶於釣名爲踈奔競之門
尚處卑拙之地既能潔已何惜愛人州主簿之提綱
昔嘗留意邑大夫之製錦今可呈功永言不憚勤勞
方謂克承闕之稍念時危而慎守勿云俗弊而難除
一門多詠雪之才衆推儒慶百里渴象雷之理勉振
政聲事須差攝舒州桐城縣令

海陵縣令鄭杞

牒奉處分守人之政爲吏所難欲俟三年有成同須
一日必葺永言委任實藉賢能前件官深於詩敏於
行不近劉與脂膩唯資謝朓膏腴累假一同備彰三
善賸彼東吳之近境實爲南充之奧區昔也承之多
勤去思猶在今可以舉舊令尹之政修真君子之誠
均調政刑遍慰黎庶展驥終希於得路割雞無憚於
發硎行乎敬哉勿聽乃力事須請攝海陵縣令

前宣州當塗縣令王翺攝揚子

牒奉處分守字之術若驅羣雞緩之則散急之則亂
此言雖小其理甚中知者非難行之不易况乃隋城

近邑楚岸通津螟蝗則久待消除鯁鯢則每思養育
前件官相門積慶儒室推賢早登庶孝之科嘗歷句
稽之任雖棲下位不墜令名果逢連師之知再假字
人之秩雉誰忍捕鵲自停喧陶潛之腰腹整 孔奮

之膏腴下潤今以揚子一同繁劇四達要衝每當使
命交馳實託宰僭勤幹遂重責成之寄况逢多事之
秋而乃有令患風請告踰月若言考秩亦合替移固
選長才俾修闕政其在上瞻夏日下視春水宜無憚
於徒勞佇有成於歷試苟有經年沉醉必虧莅事之
能如將終夕清談亦失相時之理勉於二說慎自三

思事須差攝揚子縣令

柳孝讓攝滁州清流縣令

牒奉處分今世之獎邑大夫也多以河陽花彭澤柳
爲美士永言至理我則不然唯某在其視人如傷絜
己以仕能懷冰蘓之操迥掩花柳之名實難其才得
副吾意前件官展禽苗裔言偃政能曾宰濟陰克安
屬邑久依江徼靜守窮居數年而雖甚食貧直道而
未嘗改節今將歷試俾假缺真無與喧鶻之譏勉致
驅雞之術事須差攝滁州清流縣令

前浙西館驛巡官鄉貢三傳張咸又攝山陽縣丞

牒奉處分前件官族資鵠印葉練麟經未躬壯圖嘗
從碎職既精簡牘之事寧辭州縣之勞習傳之體有
三能詳正義在公之心無二宜慎爾官往矣敬哉賞
罰斯在事須差攝山陽縣令

前婺州金華縣尉李涵攝天長縣尉

牒奉處分夫縣尉之設也其官雖卑其務甚重動則
推詳滯獄靜則慰撫疲氓是以佐偕能無其直聲寧
尹亦懷其畏色永言至理實繫長才前件官性習五
常身資一命嘗佐金華劇邑頗傳玉潔高名久見退
修誠思進取俾助養鰥之政且昇化鮪之資其在藥

作朝食水爲夕飲高懸曹捧靜和宓琴譽能息於鵲
喧勢必登於鴻漸云云

前穎上縣主簿鄭綬攝盛唐縣丞勇韋緘評事薦
牒奉處分凡城一邑皆列六曹雖云具體而微豈可
從心所欲况縣丞之佐理也令長憚其糺摘猾吏稟
其規程苟能自強何患不立前件官康成求己李智
奉公曾申穎上之勤勞遂見渭陽之論舉桓譚貳政
且宜肅彼奸豪嚴浩吟詩無用傷其貧賤事須差攝
壽州盛唐縣丞

諸葛殷知權酒務

牒奉處分推酌之權起於漢代會計之利著在周經
既當預備闕懸難可不從改作將成重務固選良才
前件官隱豹含章卧龍襲慶潔已則隋珠無類在公
則危刃有餘昨分孔僅之重司已成歷試今躡魯匡
之良策何憚專勤無辭鄭驛之卑接早致卓爐之餘
利能資美祿必瞻雄師所期百姓無譁非阻三軍告
醉事須差攝館驛巡官專知推酒務

李昭望充奉國巡官

牒奉處分昔孔子誠伯魚學曰其先祖不足稱其族
姓不足道然而大以流聲後裔者豈非學之所致乎

若然則先祖之與族姓也不唯時世所榮亦乃聖人
所重前件官搢紳上品結綬中朝方襲芸香遽飄蓬
跡遠逃滬口猶絆驥蹄今以一言為賢三代可數但
渭陽之族坐振重名漂流淮徼之居來永辟職遂茲
響應用試才能既知各有司存唯在聿修厥德事須
補充楚州營田奉國巡官

柴巖充洪澤雨塘巡官楚州榮田

牒奉處分三農就稔一溉推功苟非 降雨之渠何

以致如雲之稼俾無隳惰固藉專勤前件官壯志不

渝公才可任承之而善察軍事慎終而益見吏能今

以洪澤近封雨塘美苑徵小喻大昇高自卑爾其靜
晶冰心潛窺水脉勉稟龔黃之令遠繼田曹無慙鄭
白之名有虧地利高懸賞罰用試否臧事須差充楚
州營田院洪澤雨塘專知官

許權攝觀察衙推充洪澤巡官

牒奉處分撫俗所先勸農為最是以鄭渾則奪其獵
具溫嶠則請置田曹仰順天時俯徵日力俾督耕夫
之業須憑幹吏之才前件官歷試已多忠勤可獎令
尹之功成製錦督郵之政克提綱但承闕乏之時皆
有緝綏之譽今以山陽沃壤淮畔奧區地占三巡田

逾萬頃非乏決渠爲雨尚虧多稼如雲蓋爲編甿不
勤功於夔夔縱當稔歲皆失利於稻梁知爾奉公勸
民務本若使耰而不輟必期敏則有功委以農時假
之使職永言從政實可與權無取潤於膏腴苟徇私
於毫髮勉施乃力廣諭衆心事須差攝觀察衙推充
洪澤巡官兼都巡勘指揮奉國謝陽等巡務者

王際端公知丹陽監事

牒前件官蹈水守節飲水安貧靜吟而篋有新詩寂
坐而門無雜客卓爾君子宛然古人今以將濟軍須
誠資吏術少輟琢磨之業俾專鼓鑄之權想夷甫之

不言無虧祖德思仲宣之未遇勉俟官榮事須差知
丹陽監事

臧濬知鹽城監事

牒奉處分若官無直道則利有多門凡歷任於牢盆
或成資於潤屋而乃就此繁劇守其潔廉心誅則不
惹脂膏智刃則能分髓解嘗聆斯語罕覩其人前件
官雅淡裝懷清勤綰務嘗握由拳之權課唯遵止足
之規模休替未遙功勞可驗更資歷試必濟重難展
才於近監之鄉守節於作鹹之地不須對雪空中吟
謝朗之詩只在葵波言下見張融之賦事須補充權

糴使巡官知鹽城監事

趙詞攝和州刺史

牒奉處分昔張緒子充少好遊獵右臂鷹左牽犬緒見而謂曰一身兩役無乃勞乎充跪答曰丈夫三十而立今二十九矣請至來歲緒曰過而能改顏氏子焉其後折節修身終為賢達則古之豪俊今可規模前件官脫跡迷途投身義永除惑志可獎悛容既能資父事君是得居官理務俟上佐用試忠誠况當榮之時好縱安居之樂詞其勉輸後効善補前愆已銷九族之憂無起一朝之忿事須差攝和州刺

史

桂苑筆耕集卷之十三

桂苑筆耕集卷之十四

舉牒二十五首

淮口鎮將李質充泇淮應接使

淮陰鎮將陳季連充泇淮應接副使

宋再雄差充水軍都知兵馬使 蘇聿補衙前虞候

曹威轉補散兵馬使 許勛授廬州刺史

孫端權知舒州軍州事 朱鄰補討擊使

郝定補衙前兵馬使 容將哥舒璿兼充樂榮使

王處順充鹽城鎮使 張晏充廬州軍前催陳使

歸順軍補衙前兵馬使 安再榮管臨淮都

呂用之兼管山陽都兵馬使 獬豸都將

宿松縣令李敏之

充招討都知兵馬使

張雄充白沙鎮將

安再榮充行營都指揮使

徐莓充權酒務專知

柳孝謙知白沙權酒務

行營都虞候

曹鵬知行在進奏

補節度押衙

朱祝大夫起復

上都昊天觀

管內威儀指揮諸宮觀制置

淮口鎮將李質充沿淮應接使

牒奉處分用兵之難擇利而動不論遠者近者須賴
擣之角之在安思危有備無患前件官名起廣利勇
繼雄飛自提外戍之軍每審中權之要彼徐寇以屢
侵吾圍莫賊其鋒惡之則鼠竄彭墟緩之則豕豕楚

岸遂徵衆旅俾剗羣兇豈從接溺之權將助焚枯之
勢尔其指呼順命擒縱成功終令入海之波偏能流
惡乃使朕准之月早見洗兵茂賞高懸良時倏往勉
思委寄勿負利終事須差充必准都應接使便仰量
出兵士討除賊徒

淮陰鎮將陳李連充必准應接副使

牒前件官勇於戰賊樂在從軍操戈而只待春暎護
箭而曾無曠目自居遠戍久練雄兵每矜捍蔽之勞
能息奔衝之患今則未殲彭孽猶役楚軍將資首尾
之權是成蛇陣固藉瓜牙之利共展豹韜爾其跡脫

伍符身居貳職專防險道佇靜長淮雖云迴遶之川
未是縈紆之地坐思前哲猶傳膝下之蹤立取竒功
奸谿宵中之氣勉期竭節實謂逢時事復差充浚淮
都應接副使便仰量出兵士討除賊徒

宋再雄差充水軍都知兵馬使

牒奉處分舟楫施利干戈騁威自古為難在今所悉
固托縱橫之略始成捍蔽之功前件官學劍有成彎
弧自許嚼蔬而當年逞俊曳牛而是處爭雄高列軍門
深遵義路久居江戍妙練舟師今以泗上流災淮中
聚寇既犯觀風之境頗昏暎月之流爾其摠握雄兵

遠張秘策陸殲虺豕水截蛟螭早令賊壘皆平永使
驚波不起用官物而討官賊吾不為難探窟穴而拔
虎難余當自勗事須差充水軍都知兵馬使部領諸
兵馬討除淮內賊徒

蘇聿補衙前虞候

牒奉處分古之有言以小諭大則祁奚之請老也既
當問嗣能自舉親情不涉於阿私事何妨於委用前
件官早從吏役久習武才父也暮年既思休退子之
壯氣可代勤勞且令職在於早趨乃欲功歸於歷試
無與聿修之訓勉成負荷之規事須補充衙前虞候

曹威轉補散兵馬使

牒前件官勇而好禮勤以從戎此者暹陳衆之言詞
傳郭維之訊問果驅險浪皆赴順風尋值沛戎來使
楚壤首登鶴列深控豺牙摩壘而每能率先殷輪而
不欲言病忠誠勸已壯節驚人今則郡守論功材官
受賞俾昇峻級用報前功事須轉補散兵馬使

許勅授廬州刺史

牒奉處分良二千石古難其人屬郡之中吾有所試
勤修靜理今得人焉前件官自舉六條已踰四載邑
無吠犬境絕飛蝗外令丘井又安內致閭門肅睦政

聲則有口者訶詠仁譽則無翼而奮飛遠達宸聰果
露殊寵美秩已題於龍劍雄威愈振於隼襖旣銷滌
水之灾來作廬江之福分憂救瘼能諧聖主之心紅
旆碧幢豈落他人之手事須准勅授廬州刺史

孫端權知舒州軍州事

牒奉處分昔李弼有言大丈夫生世須履鋒刃以取
功名安可碌碌依階求仕是乃蓄志能壯謀身克成
夕脫羔裘朝驅熊軾不慙徃哲其在茲乎前件官族
繼興公術傳武子能揚俊氣之練雄師常安乞乞之
徒果就循循之誘今則委之郡政試以公才旣達豹

變之秋善守龍舒之境爲邦致理必見三年有成向
國輸忠勉令百姓無患即迎帝賞更峻官榮事復是
權知舒州軍州事

朱廓補討擊使

納助軍錢遂加職賞

牒奉處分漢有卜式者輸家財助軍費遂乃出自牧
平堅子終爲司憲大夫忠誠所施其利甚博前件官
石非砢砢鐵實錚錚知義重而財輕願忘家而報國
天龍地馬不藏私室之中尺籍五符可列軍門之下
俾昇峻級以諷頑趾既有賴於金多無自驚於銅臭
事須補充討擊使

郝定補衛前兵馬使

能手射七十步

牒奉處分弧矢之利武藝所先彌猿而永播嘉聲落
鴈而能傳妙技况乃只憑五指能伐六鈞豈非邁古
超今可謂神功聖術前件官早攻手射善應心機不
彎三百斤弓能發七十步箭紀昌若見必想攷弦呂
布相逢固慙捩臂既抱非常之伎佇成可久之功換
滑臺之舊資陟隋苑之高級事須補充衛前兵馬使
客將哥舒瑤兼充樂營使

牒前件官動彰毅勇靜保兼中早成學劍之功不墜
為裘之業頗經歷試無怠聿修久委賓司既見典言

之可使俾無樂職必期歸喜之克諧爾其有禮為先
無荒是誠迎送於燕臺鄭驛指蹤於迴雪過雲勿使
英賢或發養病之誚須令艷麗先絨笑雙之聲事須
無克樂營使

王處順克鹽城鎮使

牒奉處分大藩鎮之為制也中屯銳師外列諸戍用
備腹心之患固憑瓜牙之勤前件官深蘊壯圖挺生
勇氣姜維若在未占雄兒焦度相逢應饒健物每展
報恩之節累申伐叛之功眷彼鹽城居于海岸苟或
一同失理實為四遠多虞遂徵處順之名俾守防奸

之任爾其效勇夫之重閉致危俗之安居暨固封疆
無念及瓜之限但逢寇孽勉揚破竹之聲事須補充
鹽城鎮使

張晏充廬州軍前催陣使

牒奉處分師克在和兵貴在速若許緩其善陣誠為
挫彼奇鋒用之則行時不可失前件官志能傳略名
可止啼待逢盤錯之難願展縱橫之術今則舒猶叛
楚衛已伐邢兩雖潤於興師雲未銷於結陣遂使魚
麗猛勢阻掃氛埃蟻聚頑徒敢安窟穴爾其驅之以
馬箠訓之以豹篇事唯託於一麾功必成於百勝將

迎軍賞行送捷書事須差充廬州軍前催陣使

歸順軍補衙前兵馬使

牒奉處分前件官身榮豹飾志習龍韜奮心於擊鼓
其鏗騁力於挾輶以走早歸信義無憚勤勞去正寇
據屬城兵徵諸郡共諫微孽各誓前驅既遵令於牙
璋宜陟名於甲騎聊遷職秩用報軍功爾其勿替忠
誠更邀上賞事須補充衙前兵馬使

安再榮管臨淮都

牒奉處分西魏王儼率衆拒寇乃杖白挺大呼而詬
曰老儼當道卧糶子那得過敵見威勇果自驚奔則

知猛將之名能奪叛徒之魄前件官風精韜略歷試
機謀嘗犯重圍決成獨戰實可謂神出鬼沒豈唯
左旋右抽今之武力雖衰壯心益勵臨事而猶能強
飯即戎而寧欲素餐蠢彼頑兇騷然侵擾雖徵衆旅
未建奇功眷彼臨淮處于要地其在訓之以三令激
之以一呼審詳於彼竭我盈成就於先難後獲老驥
免嗟於伏櫪無令驚馬爭先秋鷹既逐於下韉勿使
妖狐得便事須差管臨淮都

呂用之兼管山陽都知兵馬使

牒奉處分仲尼云寬則得衆信則任人馬嘗聆斯語

今見其人前件官慶襲王璜業精金版導直道而利
有攸往奉公家而知無不為是以晉作新軍權資處
右齊行勇爵象許居先乃裨察俗之規動叶安民之
策遂得晨羊罷飲夜犬停喧永除奸濫之源深得撫
綏之道今以屬城多難散卒無依窮殍既切於投林
飛鳥猶思於擇木羣情所附戎略可嘉俾安其稽稽
然來實倚其多多益辦無辭兩投用展長才事須無
克山陽軍都知兵馬使

辦勇都將

牒奉處分凡標軍額須警衆心如指喻之非宜則訓

齋而何在况乃均霑好爵共荷殊恩跡雖限於柳營
秩盡昇於栢署宜加一等俾異三行前件官壯氣挺
生忠誠卓立殲弩則前無強敵荷戈則動有成功累
建戎勲遂霑爵賞今以狼星未滅鯨浪猶翻將申戮
暴之能用示觸邪之誦爾其勉思一角永息二心佇
銷封豕之灾勿失神羊之性事須補充辦勇軍都知
兵馬使

宿松縣令李敏之充招討都知兵馬使

牒奉處分昔來護者立性卓犖初讀詩至擊鼓其鏜
踴躍用兵羔裘豹飾孔武有力乃捨書歎曰夫人在

世固當如是會因滅賊以取功名安能區區專事筆
硯其後果申壯志累逢殊勲則知奇才所為何代不
有前件官精詳吏道劭習戎機假百里之威則疲吐
獲賴作萬夫之長則義旅知歸遂得縣道肅清鄰藩
倚賴欲破斬春之狡窟遙分江夏之兵權罷從後於
驅雞佇承之於建隼聊加職賞俾振軍聲是乃丈夫
雄飛君子豹變勉驅甲騎速應羽書既設援於他邦
必保安於吾國事須補充節度衙前兵馬使兼充西
南招討都知兵馬使

張雄充白沙鎮將

牒奉處分昇高自卑君子所以勵素志辭大就小古
人所以傳令名但能守節不虧固在相時而動前件
官密懷義勇深貯謙和頌條而政有嘉聲馭衆而軍
無愠色今以新恩未降銳旅何安眷彼古津實為要
路是成鎮務乃在江壩既居使府之要衝宜假公才
而管轄况蕪塲貨可贖軍須且卷豹韜共養斬蛟之
勇佇迎鳳詔別遷建隼之榮事須差權句當白沙鎮
務蕪知塲司公事

安再榮充行營都指揮使

牒奉處分昔曹公為樂府歌云老驥伏櫪志在千里

烈士暮年壯心不已今猶古也我得人焉前件官百戰成功一麾出守曾安海俗永振風聲而乃不求更握庸符唯願終申豹略豈覺老之將至每俟用之則行今以大慙未殲外方多難諸藩命將無非竹簡探名遠道徵師或是葵丘代戎苟虧忠勇何蕩妖兇遂付重權佇觀竒策其在身先行伍願指軍兵勉揚矍鑠之名無致遷延之後時不可失往矣敬哉事須差先行營都指揮使赴壽州西面備禦討逐黃巢徒黨者

徐壽充權酒務專知

牒奉處分前件官獲跡戒行研心吏道忠勤一州至幹
濟可觀今則舉漢代之權宜搜杜康之利潤贍吾軍
用藉爾公才既非若處先登無與衆人皆醉事須差
句當天長縣推酒務

柳孝讓知白沙場推酒務

牒奉處分前件官直道立身公途勵志學已窺室家
之富任曾致州縣之勞今以備食三行搜資六物豈
使弊歸於下只令利在其中勉稟條章早申績効俾
不欺於釀具無自陷於醉鄉事須差知白沙場推酒

務

行營都虞候

牒奉處分前件官勇而好禮敏則有功膂力甚強腹
心可委今以齊驅勁卒俾剋羣凶爾其紉摘行間防
虞境外宜拘小節善事上官勿謂忠貞有乖輯睦能
成勤劾不怯甄酬事復補充行營都虞候

曹鵬知行在進奏補充節度押衙

牒奉處分藩侯所任郎吏為先能傳萬里之音不墜
九霄之命固憑幹濟方付重難前件官魯劇長林魏
仁雄族雖處干戈之列早閑刀筆之能遂使遠赴行
朝專司適務觀六龍之仙蹕每審巡遊傳九鳳之三

言曾無阻滯以茲歷試深可獎酬今已秩亞憲卿官
昇典午身得趨於輦路職未稱於轅門俾假牙璋遙
分甲騎慎達上天之旨以安外地之心爾能竭誠吾
不恡賞事須改補攝節度押衙依前知行在進奏

朱祝大夫起復

牒奉處分事繁金革禮奪宜麻魯公制之於前晉侯
行之於後蓋乃從權順變是為移孝就忠苟不忘家
將何報國前件官方從戎役每藉公才遽鍾風樹之
悲永違霜槿之養能勤泣血唯懼奪情然以羣寇未
殲列藩多事確執三年之愛仰辜萬乘之恩况承勅

命指揮已許軍前驅使出如綸之睿旨既俟成功衣
夫錦之格言豈同前哲時異事異念茲在茲揚名顯
親竭力從命孝之終也往矣敬哉事復牒舉起復差
往五嶺已來類會軍前公事

上都昊天觀

尊讚大德賜紫謝遵符充淮南
管內成儀指揮諸宮觀制置

牒大德真璞混成靈源廣潤淘俗態於心水瑩仙女
於面冰蓬島神仙應待銜杯之樂茅家兄弟敢攀執
袂之遊猶思救苦於寰中尚阻退歡於物外屬以陣
虵出穴戎馬生郊每勤齋敬之心深假護持之力達
聖聰而有謂施醮禮以無虧今則秦嶺烟昏難尋四

老楚淮月皎幸伴八公但以桂苑繁華揚都壯麗既
見星壇月殿處處荒摧難期鶴駕霓旌時時降會啟
設精嚴之備須資揚統之權白馬將軍方役大朝之
元帥青牛道士暫充下界之仙官比年既遂於攀留
他日必同於輕舉事須請充淮南管內威儀無指揮
諸宮觀庄田等務

桂苑筆耕集卷之十四

